

# Inventar l'avegnir cun emprendistas ed emprendists

Hans Huber Stiftung e fundaziun FH Schweiz nomineschan l'Ems-Chemie

■ (cp) L'Ems-Chemie promova consequentamain la nova generaziun professiunala. Perquai è l'interpresa grischuna vegnida nominada ussa per il Premi da furmaziun naziunal 2019 (Nationaler Bildungspreis 2019). La distincziun è dotata cun 20 000 francs e vegn surdada ils 12 da november a Bienna. «La furmaziun professiunala è ina pitga fundamentala da l'Ems-Chemie», accentuescha Magdalena Martullo, la scheffa da l'Ems-Chemie. L'interpresa sa movia en in ambient extremamain innovativ e saja dependenta d'ina giuvna generaziun professiunala «cun ina scolaziun da la meglra qualidad» per esser er en l'avegnir in pass davant la concorrenza.

## Svegliar baud l'interess

Martullo suttastritga il sforz da l'innovaziun cun cifras impressiunantas: «Dus terzs da noss products èn pli giuvens che diesch onns.» Las ideas derivan savens da glied ch'ha fatg l'emprendissadi en l'interpresa. Rainer Kirchhofer, commember dal cussegl da la fundaziun FH Schweiz, punctuescha che las cumpetenzas en ils uschenumnads roms Mint (matematica, informatica, scienzas naturalas, tecnica) sajan ina premissa impurtanta per ideas novas: L'Ems-Chemie haja realisà quai e promovia gia baud l'interess per quests roms. Markus Büchi, manader dal personal tar l'Ems-Chemie, conferma: «Passa 400 uffants da la 3. fin 6avla classa primara frequentan mintg'onn nossas purschidas dal pass da vacanzas ed ils champs Mint. Là pon els experimentar ed elavurar tocs e scuvrir tala moda la fascinaziun per las scienzas naturalas e la tecnica.» En pli saja vegnì avert avant trais onns a Domat l'Emsorama – l'emprim center scientific en il chantun Grischun. Sco ulteriur project da pionier datti dapi quest onn l'Emsorama Mobil che va cun ils experiments Mint en las vallas grischunas periferas.

## Ina cumbattanta per la furmaziun professiunala

Dapi il 2003 maina Martullo l'Ems-Chemie. En questa funcziun e sco cussegliera naziunala saja ella fatga valair sco ferma promotura da la furmaziun professiunala duala, accentuescha Christian Fiechter, president da la



Emprendistas ed emprendists da l'Ems Chemie.

MAD

Hans Huber Stiftung. «E quai adina sut aspects pratics e cun atenziun per ils basegns da personas pli flailas.» Ella haja introducì en l'Ems-Chemie p. ex. er in program per personas senza furmaziun, tranter auter per fugitivs. Fiechter ha plaschair che Martullo prenda encunter personalmain il premi mardi, ils 12 da november 2019 a las 18.15 en la Scola auta spezialisada per architecture, lain e construcziun a Bienna. Surdà vegn il premi dal cusseglier naziunal Christian Wasserfallen. Il president da la fundaziun FH Schweiz vegn er a far la laudatio.

## Per l'emprima giada sin atgnas chommas

Sco interpresa en in chantun perifer sco il Grischun saja l'Ems-Chemie confruntada cun sfidas spezialas cura ch'i gaja per recutar spezialistas e spezialists, suttastritga Fiechter. Ma dapi che l'Ems-Chemie haja scolà il 1943 l'emprim laborant da chemia en il rom d'in emprendissadi tutgia l'interpresa er en il sector da recrutaziun tar las precursuras. Anc betg avunda: Ella scoleschia mintg'onn radund 40 novs emprendists en 15 professiuns e contri-

bueschia uschia al progress da l'entira regiun, lauda el. Ina contribuziun essenziala prestia l'Ems-Chemie en quest connex cun la direziun dal center da curs «emax» a Domat ch'è avert era per auters manaschis. Qua absolvan ils emprendists da l'Ems-Chemie e dad autras interpresas la scolaziun da basa da las professiuns laborant da chemia, constructur d'implants e d'apparats, manader d'implants ed automaticher. Che la scolaziun tar l'Ems-Chemie saja multifara mussa tenor Büchi, manader dal personal, l'exempel d'ina laboranta futura: «Ella lavura durant ils trais onns da l'emprendissadi en sis differents labors.» Quai saja in dals motifs che l'Ems-Chemie saja vegnida undrada dacurt era da l'organizaziun Great Place to Work sco manaschi d'emprendissadi certitgà. Fitg popularas èn tar ils emprendists las pussaivladads da far barats: Mintg'onn survegnan fin dudesch emprendists la schanza da lavurar per trais mais en ina da las 26 filialas da l'Ems-Chemie a l'exteriur – da la Brasilia fin en la China. «Per ils emprendists è quai ina chaschun singulara da star per l'emprima giada sin atgnas chommas e d'empen-

der d'enconuscher in'otra cultura», declera Büchi e cumplettescha: «I po capitar ch'els daventan là sezs ils 'instructurs' grazia a lur know-how.»

## Nagins cunfins

L'Ems-Chemie ha ina clera filosofia quai che pertutga la furmaziun professiunala: «En il center stat la furmaziun da glied da professiun qualifitgada bain en ils manaschis ed en las partiziuns. Tgi che sa cumprova duai però era survegner la schanza da surpigliar rollas directivas e/u far la maturitad professiunala e pli tard forsà er il studi d'inschigner», declera Conrad Gericke, il manader dal svilup strategic dal personal tar l'Ems-Chemie. Pertge che collavuratur cun bunas qualificaziuns èn tshertgads sin tut ils stgalims. En il cader superiur da l'Ems-Chemie lavuran gist plirs anteriurs emprendists. Quai mussa che la glied da professiun giuvna ha tut las pussaivladads. Questa permeabilitad è tenor Kirchhofer in ulteriur motiv per la nominaziun da l'Ems-Chemie per il Premi da furmaziun naziunal.